

Conférence Episcopale d'Haïti CEH

56, Angle Rues Piquant et Lamarre, Champ-de-Mars, HT 6110, Port-au-Prince, Haïti (W.I.)

Tél. : (509) 3701-2232 / 3701-2215 / 3388-7304

e-mail : ceh56@hotmail.com / URL : <http://eglisecatholiquedhaiti.org>

NÒT KONFERANS EVÈK KATOLIK PEYI AYITI YO SOU SITIYASYON SOSYOPOLITIK LA

Frè ak sè nou yo,
Tout moun ki gen bòn volonte,

1. Nan non Jezikri, Sovè tout moun, nan non misyon Legliz la genyen pou l di laverite, Legliz la pa gen dwa kite moun ap peri nan move kondisyon lavi li, paske sa lavi sere pou moun makonnen avèk listwa lavi Jezikri. Sa vle di : sa moun ap chwazi nan lavi a, sa kap sove l oubyen sa kap fè l pèdi chemen l, tout sa makonnen sere sere ak Jezikri (Cf. Pape Jean Paul II, *Redemptor Hominis*, n.14).
2. Se konsa Legliz la nan peyi Ayiti ap veye sou tout Pèp Ayisyen an ak anpil renmen nan kè l. Se yon responsablite ki antre nan misyon l menm pou li rete atantif epi sansib devan tout kesyon Pèp la ap poze, devan tout kè kase ak kè sere l yo. (Cf. Jean Paul II, *Redemptor Hominis*, n. 15). Anpil mesaj Konferans Evèk Ayiti yo montre angajman Legliz la bò kote Pèp Ayisyen an ki pa sispann goumen pou jwenn jistis, lapè ak lavi miyò.
3. Nan moman tèt chaje nap viv jounen jodi a, rèl soufrans kè sere sè ak frè nou yo rezonnen byen fò nan kè nou menm Evèk yo, bèje Pèp Bondye a. Men sa ki lakòz kout rèl sa yo : se gang ki pouse tankou djondjon ak gwo zam lou nan men yo, yap fè lalwa nan peyi a; se vyolans tout kalite tout koulè; kidnaping, ensekirite ki anpeche moun sikile libelibè nan peyi a, se krim, enpinite, enstabilite politik, estrikti Leta a ki tonbe andegraba; se lavi chè, se Kovid-19 la ki tounen pi rèd, elatriye...
4. Devan sityasyon sosyopolitik ak ekonimik sa a kap degrade chak jou pi plis la, nou mande tout aktè politik yo, fi tankou gason ki nan pouvwa a, sila yo ki nan opozisyon radikal tankou modere, pou yo fè sa yo konnen pou retire sou do Pèp la yon bann chaj lou ki anpeche l mache rive nan devlopman l tout bon. Youn nan chaj sa yo, se vle yo vle, wè pa wè, òganize yon referandòm pou bay peyi a yon nouvo Konstitisyon.
5. Jan nou te di l nan mesaj Nwèl 2020 an, « si anpil moun leve vwa yo pou mande pou gen chanjman ki fèt nan Konstitisyon an, oubyen pou gen yon lòt Konstitisyon, sa dwe fèt yon jan ki korèk epi ki mete tout moun dakò. Men se pa konsa sa ap fèt koulye a. Se pa nan mitan yon kriz politik grav konsa pou yo ta pran desizyon pou ranplase yon Konstitisyon. Nan mitan yon kriz ki difisil anpil pou tout aktè politik yo rive antann yo pou nou soti ladan l. Non, se pa bon lè pou yo pran desizyon sa a. Si yo vle fè l wè pa wè, sa pral foute peyi a nan yon lòt kriz ki pi rèd toujou. Nap viv koulye a yon sityasyon sosyal ak politik ki gen ladan l : divizyon ak chire pit, youn pa fè lòt konfyans, vyolans tout kalite tout koulè. Sityasyon sa a pa bon pou yon kokennchenn chanjman konsa ki mande patisipasyon tout fòs moun ak enstitisyon ki gen nan peyi a. Desizyon sajès la nan moman sa a, se kanpe sou referandòm nan. Nou mande nou, tanpri souple, pa pran chemen sa a kap mennen peyi a nan pi gwo tèt chaje toujou.
6. Pèp Ayisyen an anjeneral pa ka tann ankò pou l wè peyi a soti anba mizè, ensekirite, enstabilite ak ilegalite san bout sa a. Se poutèt sa, nou dwe deside travay ansanm, san pèdi tan, pou lapè ak chanjman

tout bon tabli nan peyi a. Kijan nap rive fè sa, si dabò nou youn pa aksepte lòt la tankou frè ak sè, pitit yon menm nasyon ? Kijan nap rive fè sa, si nou pa relanse san pèdi tan machin demokrasi a pandan nap bay pèp la okazyon pou l chwazi dirijan l yo nan bon jan eleksyon ki lib epi ki transparan ?


7. Nan non misyon sa a nou genyen pou nou mache bò kote pèp Ayisyen an nan batay lap mennen chak jou pou yon lavi miyò, epi pou l vin pi pre Bondye, pou lapè kapab tabli tout bon nan bati bon jan demokrasi, nou mande tout Ayisyen, fi tankou gason, pou nou pa kite yo vòlè lesperans lan ki se motè lavi nou. (cf. CEH, *Mesaj Nwèl, 2020*). Ayiti pap mouri ! Se avèk kouraj, nan pèsèverans, kenbe pa lage ; se avèk sajès nap rive konstwi l !
8. Se pou Lavyèj Mari, Manman Pèpetyèl Sekou, Patwòn peyi nou an, lapriyè pou nou. Se pou Jezikri, Sovè nou an, avèk konkou Lespri Sen an, fè Lajistis, Lapè ak Tèt Ansanm triyonfe nan peyi nou ! Se pou Bondye beni nou, se pou l beni Ayiti !

Nòt sa a soti nan Lilavois, kay kote Evèk peyi Ayiti yo reyini, jou premye jen 2021 an, jou fèt Sen Justin ki te mouri mati.


Men Evèk ki siyen nòt sa :




Monseigneur Launay SATURNE
Achevèk Okap Ayisyen
Prezidan CEH



Monseigneur Max Léroy MESIDOR
Achevèk Pòtoprens
Visprezidan CEH



Monseigneur Ducange SYLVAIN, SDB
Evèk Oksilyè Pòtoprens
Sekretè Jeneral CEH



Monseigneur Desnord JEAN
Evèk Ench
Ekonom CEH




Kadinal Chibly LANGLOIS
Evèk Okay



Monseigneur Pierre André DUMAS
Evèk Ansavo ak Miragwan



Monseigneur Joseph Gontrand DECOSTE, SJ
Evèk Jeremi



Monseigneur Marie Erick Glandas TOUSSAINT
Evèk Jakmel

+4
Yves Marie Pean

Monseyè Yves Marie PEAN, CSC
Evèk Gonayiv

Barthélemy Charles Peters

Monseyè Charles Peters BARTHELUS
Evèk Pòdepè

+ *Quesnel Alphonse*

Monseyè Quesnel ALPHONSE, SMM.
Evèk Fòlibète

